

CUI CH'O SIN E CE CH'O VOLÌN

And è tancj che a van atôr disint di jessi amîs dal Friûl che, par tancj di lôr, e je intrigade rivâ a disserni se a son veramenti pro o cuintri. A bocje, ducj a son pal Friûl. E sarès bieles che a disessin di jessi cuintre! Ma in ce mût e maniere intindino di jessi pal Friûl?

Prime però di domandâ a di chei âltris ce che a son, al è di just che si presentin nô.

O sin furlans, furlans nassûts e cressûts in Friûl. E fin chi o sin precîs edentics di âltris sietcent e passe mil. O sin di chêi furlans che a doprin la lôr lenghe come lenghe materno, come espression di un popul, come anime e speli di une gjernazie. E chi o sin cuintri di chêi pôcs o trops che a son e a si vantin di jessi furlans di lenghe taliane. No credin a pantianis dal gjenar, parcè che il prin afiet si lu mostre no vergognantsi, ma tignintsî in bon di doprâ simpri e dapardut la lenghe dal popul che si dîs di jessi. Lassin che a sedin i talians a doprâ e a difindi la lôr; nô difindin, doprin, dingji onôr a la nestre lenghe. Se no o sin basars o vendûts o sempios.

O sin furlans di lenghe furlane che a son cunvints di fâ part de "nazion" furlane. Che al è come dî che o sin un popul, une etnie, une nazion che, dopo tancj parons che a àn balinât di chestis bandis dilunc i secui, cumò, di cent agns indaûr, o sin cjapâts dentri tal tramai dal stât talian.

O sin ancje patriots. Di fat si batin par difindi, fin che il Signôr nus darà flât e fuarce di scombati, pal ben e pe libertât de nestre patrie. Al è clâr che par "patrie" o intindin la "cjase dal pari", ven a stâi il Friûl. No nus va la liende de piçule e de grande patrie. Un om normâl al à une mari sole. La seconde, se le à, o che e je tirade dongje dal pari o che e je une mari lastre.

Cussì o sin de idee che patrie and è une sole, il Friûl. Il nestri patriotisim al rive fin là, sperant che âltris popui di chest baracon che si clame Italie a difindin la lôr tiere e la lôr int. O sin, al è clâr, par un federalisim, come che a disevin cent agns indaûr. Cualchidun al voleve vê in teste il pape, cualchi âltri, Balbo e compagnie, al voleve vê il re. Nainis di une volte. L'impurtant e jere l'idee, che e jere imbrucjate juste. No si pues tignî sù un stât dât dongje tant malamenti, tant diferent e tant malamenti governât. Par chel o vin plui sperance te Europe, fate cence bufulis romantichis, che no ta l'Italie. Ant vin viodudis masse par sperâ che si mendi.

O sin furlans che a tegnin a la lôr storie come l'arbul al ten a la sô lidrîs. E te storie al torne fûr il concet e la realtât di stât furlan, de nestre autonomie (une peraule tant grivie di parâ jù che al sarès dibot plui clâr fevelâ di independence, par chêi che no le capissin a buinis), dal nestri dirit di disponi in maniere spotiche de nestre tiere e dal nestri distin. Come che a àn dirit i neris de Afriche!

Dongje de storie, naturalmentri, o metìn la gjeografie, che senò no si capìs nancje la storie. E chi al ven fûr il puest impuartantissim dal Friûl come crosere de Europe, come popul mittel-europeo. Al è di stupits sierâ i vôi su la posizion che al à il Friûl te crosere di trê civiltâts. Chi al è nassût e cressût e chi al à di restâ. Che se i gjavin i siei rapuarts par in sù e par in bande, lu incjantonin che nol rive adore plui di ripiâsi.

O sin furlans che a scombatin par che une region tant imbastardide come chê che nus àn dât dongje i satrapos di Rome cu la buine man dai pulitics nostrans, e vegni disfate prime che al sedi masse tart. E par chel ur darin une man ancje ai triestins par judâsi a dividisi.

No podín, naturalmentri, dismenteâ o fâ fente che nol existi il probleme dal teremot. Di chel vêr, che al à slambrât il cûr dal Friûl e che no si viôt ancjemò dí, e ancje di chel teremot che si clame sotanisim, miserie, mancjance di scuelis e di universitât, di puescj di lavôr e di comant, di garantiis che l'Italie, a vacje vie, ur dà ai fuarts e ur dinee ai debui, cun grant scandul e trist esempi par ducj. Par chel in Italie e à cjapât tant pît la violence. Cence volê gjavâ la gravitât de situazion, tocje ameti che chêi che a train a àn capît che no 'nd è âltris stradis par rivâ al intendo. E chest al è no mâl, ma malissim!

Come furlans che a àn supât dutis lis virtûts e ducj i difiets de lôr int, o podin dí che, fale cualchi brute ecezion, il popul al è ancjemó in grât di deliberâsi des cjadenis che lu tegnin peât.

Baste che al viergi i vôi, che al dopri il cjâf e no dome la pale, e che al sepi disferenziâ a colp i nemîs dai amîs. E soledut che no si lassi freâ cu la sflocje di jessi la vuaite e la sentinele di chêi che a stan sentâts a salocâ.

O vin di jessi prin di dut e soledut furlans. Furlans che a crodin in cheste int che di crôs and à vudis ma che e à savût simpri tornâ a dâ di ca. Cumò la robe e je plui grivie, ma si rive. Baste volê. Baste stâ unîts. Baste no tradî la nestre esperience popolâr, contadine, artesane, cristiane.

In chest telâr, nus semee che e vadi cjapade sul serio la propueste e la idee di une union popolâr furlane. Lete a la todescje vie, però. Ven a stâi prime FURLANE, po dopo POPOLÂR e par ultin UNION. Se no je furlane,

no vâl la pene di unîsi. Se no je popolâr e riscje di diventâ une bufule che e finîs di dividi in classis ancjechel pôc di popul che nus è restât. Cuant che si rivarà adore di jessi furlans e pe int, si podarà ancje fevelâ di union. Che anzit e vignarà dibessole. L'impuartant al è smicjâ a la sostance, prime che no ai colôrs. Se po dopo si vuelin doprâ ancje colôrs, nô o proponaressin, par no simiotâ i talians che a son o ros o blancs o neris, di tignî doi colôrs: zâl e blu. I colôrs de nestre bandiere.

Editoriâl de La Patrie dal Friûl di Dicembar dal 1978, n. 0